

# 我歌月徘徊·中秋诗词

## 编者按

八月,一个团圆的季节。

在古今众多文豪名士的诗词里,今晚的月亮是清新皎洁,如冰山雪莲一样美丽。徜徉在它们的字里行间,只感觉如水的夜色里,化成一缕淡淡的银光,淹没在一片清辉中的,有欢乐,有怅惘,有思念,惟愿“花间一壶酒,独酌无相亲。举杯邀明月,对影成三人”。本版撷取歌咏中秋的古诗词,让它们为异乡情思的归来人,照亮一丝温暖。

## 《中秋待月》

陆龟蒙

转缺霜输上转迟,好风偏似送佳期。  
帘斜树隔情无限,烛暗香残坐不辞。  
最爱笙调闻北里,渐看星潋失南箕。  
何人为校清凉力,欲减初圆及午时。

## 《中秋月》

晏殊

十轮霜影转庭梧,此夕羁人独向隅。  
未必素娥无怅恨,玉蟾清冷桂花孤。

## 《倪庄中秋》

元好问

强饭日逾瘦,狭衣秋已寒。  
儿童漫相忆,行路岂知难。  
露气入茅屋,溪声喧石滩。  
山中夜来月,到晓不曾看。

## 《十五夜望月寄杜郎中》

王建

中庭地白树栖鸦,冷露无声湿桂花。  
今夜月明人尽望,不知秋思落谁家?

## 《八月十五日夜湓亭望月》

白居易

昔年八月十五夜,曲江池畔杏园边。  
今年八月十五夜,湓浦沙头水馆前。  
西北望乡何处是,东南见月几回圆。  
昨风一吹无人会,今夜清光似往年。

## 《旅中秋月有怀》

朱庆馀

久客未还乡,中秋倍可伤。  
暮天飞旅雁,故国在衡阳。  
岛外归云迥,林间坠叶黄。  
数宵千里梦,时见旧书堂。

## 《八月十五夜月二首》

杜甫

满目飞明镜,归心折大刀。转蓬行地远,攀桂仰天高。  
水路疑霜雪,林梢见羽毛。此时瞻白兔,直欲数秋毫。  
稍下巫山峡,犹衔白帝城。气沈全浦暗,轮仄半楼明。  
刁斗皆催晓,蟾蜍且自倾。张弓倚残魄,不独汉家营。

## 《水调歌头》

苏轼

明月几时有,把酒问青天。  
不知天上宫阙,今夕是何年。  
我欲乘风归去,又恐琼楼玉宇,高处不胜寒。  
起舞弄清影,何似在人间。  
转朱阁,低绮户,照无眠。  
不应有恨,何事长向别时圆?  
人有悲欢离合,月有阴晴圆缺,此事古难全。  
但愿人长久,千里共婵娟。

## 《满江红·中秋寄远》

辛弃疾

快上西楼,怕天放、浮云遮月。  
但唤取、玉纤横笛,一声吹裂。  
谁做冰壶浮世界,最怜玉斧修时节。  
问嫦娥、孤冷有愁无,应华发。  
玉液满,琼杯滑。长袖起,清歌咽。  
叹十常八九,欲磨还缺。  
若得长圆如此夜,人情未必看承别。  
把从前、离恨总成欢,归时说。

## 《中秋旅舍书怀》

薛能

云卷庭虚月逗空,一方秋草尽鸣虫。  
是时兄弟正南北,黄叶满阶来去风。

## 《八月十五夜桃源玩月》

刘禹锡

尘中见月心亦闲,况是清秋仙府间。  
凝光悠悠寒露坠,此时立在最高山。  
碧虚无云风不起,山上长松山下水。  
群动悠然一顾中,天高地平千万里。  
少君引我升玉坛,礼空遥请真仙官。  
云轩欲下星斗动,天乐一声肌骨寒。  
金霞昕昕渐东上,轮欹影促犹频望。  
绝景良时难再并,他年此日应惆怅。

## 《念奴娇·中秋对月》

文征明

桂花浮玉,正月满天街,夜凉如洗。  
风泛须眉并骨寒,人在水晶宫里。  
龙偃蹇,观阙嵯峨,缥缈笙歌沸。  
霜华满地,欲跨彩云飞起。  
记得去年今夕,酹酒溪亭,淡月云来去。  
千里江山昨梦非,转眼秋光如许。  
青雀西来,嫦娥报我,道佳期近矣。  
寄言俦侣,莫负广寒沈醉。

